

## **Rede von Oberbürgermeisterin Henriette Reker anlässlich der Proklamation des Kölner Dreigestirns, 6. Januar 2023**

Es gilt das gesprochene Wort!

Leev Fründinne un Fründe vum kölsche Fastelovend,  
leev designeet Dreigesteen,

dis Johr fiere mer 200 Johr kölsche Fasteleer. Ein Saach es för mich klor: Wann et jet em Sieleleve vun de Kölsche jitt, wat iwig bliev, dann es et unser Fastelovend.

Ich denken dobei an de Sessione voll vun Freud, an uns kölsche Leeder, an die herrlich bungkte Zöch, an de Uuzereie – un natörllich an et Fiere ohne drop zo aachte, wat dä andere es, un wat hä an de Fööß hät: ov krüzz oder quer, ov Knäch oder Häär, wie et en uns Motto heiß.

Leev Jecke, ich denken ävver och an die schwer Zigge in denne 200 Johr.

Der eeschte Rusemondaachszooh noh dem Zweite Weltkreech ging durch de Trümmerberch vun uns Stadt. Dä Zoch zeichte, dat et Levve widder zeröck wor un joov de Kraff, alles widderopzebaue.

Em vürrije Johr maaten die Jecke us dem Rusemondaachszooh de jrößte Demonstration för der Fridde en uns Stadtjeschichte – och dat sorchte doför, dat de Minsche beieneinston.

Un dis Winter, en däm de Ukraine sich en enem Kreech  
verteidije muss, en däm et en ville Wonnunge – och he en Kölle  
– kalt es un et all durer weed; jo, dis Winter wärmp uns der  
Fastelovend, liet de Sorje vum Alldach futü jon – un uns  
förenander do sin.

All dat zeich: Der Fastelovend jehööt zick 200 Jahr bei Kölle.  
Op ihn ka'mer sich verlobe – zo all Zigge.

Leev Jecke, do kölsche Fasteleer – hä hät en besonder Plaaz  
nit nor en mingem Hätze, och en de Hätzer vun su vill Kölsche.

Dat dat su bliev, welle mer de Traditione met Bedaach fläje –  
domet meinen ich nit dat kodde Benemme vum Elften im Elften.  
Mer welle de Traditione erhalte, zammeston, sich met Fiduuz  
maskiere un hätzlich juuze.

Jo, mer welle dis Jubiläumssession et fründlich laachende  
Jeseech vum Fastelovend zeije.

Un doröm folje mer hück enem ahle Ritual.

Ich dun Üch jetz – der Reih noh – wie et de Tradition verlangk –  
proklamiere.

Leeve Boris Müller,

Do küss – wie et ganze Trifolium – us de Reihe vun de Kölsche  
Funke rut-wieß vun Achzehnhundertdreiuunzwanzig. Ehr draht  
de Färve vun unser Stadt en üüre Plagge.

Rut – dat steit för et Hätzbloot, met däm mer en Kölle  
Fastelovend fiere. En däm Sinn solls Do e Vörbild för alle Jecke  
sin. Versprichs Do, met Aki un Jeföhl de kölsche Aat zo fiere  
unger et jecke Volk zo bränge un besondersch die jung Kölsche  
doför zo bejeistere?

Dann gevven ich dir jetz hee die Pritsch. Met dä Pritsch häs do  
de Maach üvver et jecke Volk.

Ich proklamiere dich zom Prinz Karneval Prinz Boris der  
Eeschte.

Leeve Marco Schneefeld,  
als Bur fiers Do met. Ävver Do häls dem Rut vum Hätze, et  
Wieß vum Respek un vum Fridde entjäre. Do häs die wichtije  
Opjav, all die, die us der Reih danze, zo mahne, aanständich zo  
blieve. Versprichs Do, de Jecke dran zo erennere, dat der  
Fastelovend e Fess vum zosammehalde es?

Dann kriss do jetz hee vun mir de Stadtschlössele för uns  
schön Kölle, op dat Do de Stadt vör Unjlöck bewahrs.

Ich proklamiere dich zom Kölner Bauer Marco.

Leeve André Fahnenbruck,  
als Jungfrau es et ding Opjav, de Roll vun der Mutter Colonia zo  
üvvernemme. En däm Spejel sulls Do Dich nit nur selvs

bewundere. Wells Do och denne de Spejel vörhalde, die sich donevve benemme un se su widder för der traditionelle Fastelovend bejeistere?

Dann nemm dä Spejel.

Ich proklamiere Dich zor Kölner Jungfrau Agrippina.

Et Trifolium es jetz vollständig proklamiert, Herr Präsident.

Op uns Heimatstadt Colonia, op de Kölsche Fasteleer un op uns Dreigesteen.

Dreimol vun Hätze: Kölle, Fesskomitee, Jöözenich – Alaaf!